

Haramkan antibiotik dalam makanan ternakan

SAUDARA PENGARANG,

PERSATUAN Pengguna Pulau Pinang (CAP) ingin memberikan maklum balas kepada kenyataan Timbalan Ketua Pengarah Jabatan Perkhidmatan Veterinar, Datuk Dr. Quaza Nizamuddin Hassan Nizam pada 17 Mac lalu.

Dalam kenyataan itu, beliau mengesahkan penggunaan antibiotik di ladang ternakan di negara ini. Bahan itu dimasukkan secara rutin di dalam makanan ternakan untuk mempercepat pembesaran haiwan berkenaan khususnya dalam kalangan penternak ayam, itik dan babi.

Antibiotik juga diberikan kepada haiwan terbabit bagi mencegah jangkitan penyakit dan meningkatkan kualiti daging ternakan.

CAP ingin menegaskan bahawa penggunaan antibiotik secara rutin akan membentuk kekebalan kuman dalam badan

haiwan terhadap bahan itu yang kemudian berpindah kepada manusia yang memakan daging binatang berkenaan.

Ancaman kesihatan awam di seluruh dunia ini telah mendorong banyak negara termasuk Kesatuan Eropah (EU) untuk mengharamkan penggunaan antibiotik secara rutin dalam makanan ternakan.

Antibiotik tidak sepatutnya disalahgunakan untuk mencegah penyakit dan menggalakkan pembesaran haiwan sebaliknya hanya untuk merawat jangkitan kuman pada manusia sahaja.

Sehubungan itu, CAP mengulangi gesaan supaya kerajaan mengharamkan penggunaan antibiotik dalam makanan ternakan berikutan ancaman kepada kesihatan awam adalah amat besar sekali.

S. M. MOHAMED IDRIS
Presiden CAP

PENTERNAK memasukkan antibiotik di dalam makanan haiwan bagi mempercepat pembesaran binatang dan mencegah jangkitan penyakit. - GAMBAR HIASAN/UTUSAN

